

Visoki predstavnik i specijalni predstavnik EU Inzko sastao se sa talijanskim sekretarom za vanjske poslove, talijanskog Ministarstva vanjskih poslova i talijanskim ambasadorom u BiH



Visoki predstavnik i specijalni predstavnik EU Valentin Inzko danas se u Sarajevu sastao sa talijanskim državnim sekretarom za vanjske poslove Alfredom Manticom, članovima talijanskog Ministarstva vanjskih poslova i talijanskim ambasadorom u BiH Raimondom De Cardonom. Visoki predstavnik i specijalni predstavnik EU Inzko i talijanska delegacija razgovarali su o trenutnoj političkoj situaciji u BiH, te su naglasili da prioriteti međunarodne zajednice u pogledu BiH ostaju isti, a to je da BiH postane funkcionalna zemlja na putu ka Evropskoj uniji.

Govoreći o nedostatku pomaka u reformskom procesu, visoki predstavnik i specijalni predstavnik EU Inzko je rekao da BiH u posljednje četiri godine zaostaje za svojim susjedima kad su u pitanju evropske integracije. Vrijeme je da političari u BiH donesu sve potrebne odluke koje će povesti zemlju naprijed.

"Umjesto napretka, svjedoci smo brojnih osporavanja Dejtonskog mirovnog sporazuma i odluka visokog predstavnika, što je potpuno neprihvatljivo. Svi faktori u BiH moraju pokazati da se u potpunosti pridržavaju Dejtonskog sporazuma i poštuju ovlasti visokog predstavnika", rekao je visoki predstavnik i specijalni predstavnik EU Inzko.

On je također informirao talijansku delegaciju o tekućim pripremama za narednu sjednicu Upravnog odbora Vijeća za provedbu mira, koja će se održati krajem februara i na kojoj će se razgovarati o situaciji u zemlji i pomacima ostvarenim u implementaciji programa 5+2.

Senator Mantica je naglasio da Italija nastavlja podržavati napredak BiH ka EU i NATO-u te da pozdravlja liberalizaciju viza za građane BiH, za koju se nada da će biti ovog ljeta.